



Maršala Tita 25, 71000 Sarajevo

Broj: 150-15-4-1154-6 /21 MM  
Sarajevo, 18.06. 2021. godine

Na osnovu člana 69. stav (2) tačka d) i člana 70. stav (1), stav (4) i (6) Zakona o javnim nabavkama („Službeni glasnik BiH“, 39/14), člana 50. stav (1) Pravilnika Centralne banke Bosne i Hercegovine, broj: UV-104-01-1-116/15 od 28. decembra 2015. godine i broj: UV-122-01-1-1045-11/21 od 28. aprila 2021. godine, člana 13. stav (2) tačka b) i člana 45. stav (2) Pravilnika o javnim nabavkama Centralne banke Bosne i Hercegovine, broj: UV-150-01-1-1467-3/20 od 27. jula 2020. godine, guverner Centralne banke Bosne i Hercegovine, donosi

## **ODLUKU**

### **o poništenju postupka javne nabavke robe – sistem za popis stalnih sredstava**

#### **Član 1.**

Ovom odlukom se poništava postupak javne nabavke robe – sistem za popis stalnih sredstava, putem konkurentskog zahtjeva za dostavu ponuda, procijenjene vrijednosti u iznosu od 21.360,00 KM (slovima: dvadesetjednahiljadatristotinešezdeset konvertibilnihmaraka i 00/100), iz razloga što nijedna od primljenih ponuda nije prihvatljiva.

#### **Član 2.**

Centralna banka će o rezultatima provedenog postupka javne nabavke obavijestiti ponuđače.

#### **Član 3.**

Za realizaciju ove odluke zadužuju se Odjeljenje za javne nabavke i Odjeljenje za računovodstvo i finansije Centralnog ureda Centralne banke Bosne i Hercegovine.

#### **Član 4.**

Ova odluka će se objaviti na web stranici Centralne banke Bosne u Hercegovine, [www.cbbh.ba](http://www.cbbh.ba), istovremeno sa upućivanjem obavještenja o rezultatima postupka ponuđačima koji su učestvovali u postupku javne nabavke, u skladu sa članom 70. stav 6. Zakona o javnim nabavkama („Službeni glasnik BiH“, broj 39/14).

## **O b r a z l o ž e n j e**

Postupak javne nabavke robe – sistem za popis stalnih sredstava, putem konkurentskog zahtjeva za dostavu ponuda, pokrenut je Odlukom o pokretanju postupka, broj: 150-15-4-1154-2/21 SAK od 12.05.2021. godine. U skladu s tim, Centralna banka je 27.05.2021. godine na portalu Javnih nabavki objavila Obavještenje o nabavci broj: 1370-7-1-258-3-155/21.

U predviđenom roku za dostavljanje ponuda, odnosno do 09.06.2021. godine, blagovremeno su dostavljene dvije ponude ponuđača:

1. ŠPICA SYSTEMS d.o.o., Mehmeda Spahe 10, 71 000 Sarajevo
2. Optima d.o.o., Hrvatskih branitelja 8a, 88 000 Mostar.

Komisija nadležna za provođenje postupka javne nabavke (u daljem tekstu: Komisija) je izvršila pregled i ocjenu pristiglih ponuda, te konstatovala da pristigle ponude ne ispunjavaju sve uslove iz tenderske dokumentacije.

Ponuda ponuđača ŠPICA SYSTEMS d.o.o. je neprihvatljiva iz slijedećih razloga:

- Ponuđač nije dokzao ispunjavanje traženih uslova iz tenderske dokumentacije koji se odnose na tehničku i profesionalnu sposobnost. Naime, tenderskom dokumentacijom je traženo slijedeće: „Uspješno iskustvo u realizaciji najmanje 1 ugovora isporuke predmeta nabavke za period ne duži od tri godine ili od datuma registracije, odnosno početka poslovanja, ako je kandidat/ponuđač registrovan odnosno počeo sa radom prije manje od tri godine, ukupne vrijednosti svih ugovora minimalno 21.000,00 KM.“

Ponuđač je dostavio spisak izvršenih ugovora i četiri potvrde drugih ugovornih strana o uspješno realiziranim ugovorima, koji imaju veze sa predmetom nabavke. Komisija je dvije potvrde (Općina Centar Sarajevo i ASA banka d.d.) ocijenila kao valjan dokaz tehničke i profesionalne sposobnosti, ali ukupna vrijednost realizovanih ugovora u prethodno navedenim potvrdama je manja od 21.000,00 KM, što je minimalni zahtjev iz tenderske dokumentacije. Komisija je ocijenila da dvije potvrde (Union Banka d.d. i Filozofski fakultet u Sarajevu) nisu valjan dokaz tehničke i profesionalne sposobnosti, jer se u potvrdama navodi uspješna realizacija ugovora iz 2014. i 2017. godine, što nije u skladu sa prethodno navedenim zahtjevom iz tenderske dokumentacije.

- Ponuda ponuđača Optima d.o.o. je neprihvatljiva iz slijedećih razloga:

Ponuđač je ponudio robu koja ne ispunjava sve tražene zahtjeve iz tehničke specifikacije – Aneks 8 tenderske dokumentacije. Printer Zebra ZD500R (stranica 23/40 u ponudi), koji ponuđač nudi, ne ispunjava zahtjev iz tehničke specifikacije u dijelu koji se odnosi na brzinu ispisa. U tehničkoj specifikaciji, kao minimalni zahtjev koji ponuđeni uređaj mora ispunjavati, stoji brzina ispisa 356mm/sec. Komisija je provjerila tehničke karakteristike ponuđenog uređaja i saznala da ponuđeni uređaj ima maksimalnu brzinu ispisa od 152mm/sec.

Shodno navedenom, Komisija u svom Zapisniku o pregledu i ocjeni ponuda, broj: 149-15-4-1323-6/21 od 10.06.2021. godine i Izvještaju o radu komisije sa Preporukom broj: 149-15-4-1323-7/21 od 10.06.2021. godine dala preporuku za donošenje odluke kao u dispozitivu.

#### **Pouka o pravnom lijeku:**

Protiv ove odluke može se u pisanoj formi uložiti žalba Centralnoj banci Bosne i Hercegovine u roku od 10 dana od dana prijema ove odluke.

Dostaviti:

- guverneru
- viceguvernerima
- uredu glavnog internog revizora
- Predsjedniku i članovima komisije
- Odjeljenju za računovodstvo i finansije (original)
- Odjeljenju za javne nabavke (original)
- Odjeljenje za informacione tehnologije
- u spis predmeta (original)
- arhiva

**GUVERNER**



**dr. Senad Softić**